

**Naartunermi, erninermi meeravissiarternmilu sulingiffeqartarneq pillugu anaanaasut tamarmik sapaatip akunneranut akunnernik 40-nik erninerminnik, sapaatit akunnerini 19-  
ini, sionratigut suliffigisimasaq apeqqutaatinnagu ullormusiaqarnissaasa  
pisinnaatitaaffigilernissaannut, Inatsisartut inatsisaasa allanngortinnissaanut  
Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Jens NapãtôK', Naleraq)

### **Aappassaaneerinnineq**

Qujanaq Siulittaasoq.

Siullermeerinninnermi Naleqqamiit oqariartuutigaarput naartunermiit meeqqanut naligiinngisitsineq pillugu oqallinneq aammalu iliuuseqarnissaq aallartittariaqartut. Maanna ataatsimiititaliap suliarinninnerata kingorna ataatsimiititaliamiit uppersarsineqarpoq ajornartorsiut piviusuusoq. Taamaattumik pinngitsoorani iliuuseqartoqartariaqartoq Naleqqamiit inassutigaarput.

Paasissutissat takutippaat erninermi ullormusianik tiguisartut 30 %-iisa missaat minnerpaamik erninermi ullormusiaqartartut. Tassa imaappoq ukiumut innuttaasut amerlasuut meeqqaminnik inoorlaanik isumassuinerminni appasinnerpaamik ikiorsiissummik tunineqartarput. Tamanna meeqqat pisinnaatitaaffiinut naleqqutinngilaq aaamma meeqqanut naligiinnginnermi ingerlatsisoqartoq takuneqarsinnaavoq, taamaattumik Naleqqamiit oqaqqikkumavugut aalisartukkormiut, piniartukkormiut, savaatillit, anaanat kisimiittut, allallu tassunga attuumassuteqartut tamaasa meeqqat inuunermi aallarnerfianniit naligiinneq misigitinneqartalernissaa annertuumik naqissuserlugu aaqinneqartariaqarpoq. Tassani pineqarput 40 time ataallugit ullormuusianik tiguisartut.



Naleqqamiit nuannaarutigaarput partiit tamarmik isumaqatigiissutigimmassuk meeqqat tamarmik assigiimmik naleqartut aammalu pitsaanerpaamik aallartinnissaminnut pisinnaatitaaffeqartut.

Aamma nuannaarutigaarput ataatsimiititaliap Naalakkersuisut allannguutissatut siunnersuutaat pitsanngorsarlugu suliarisimammassuk. Maanna misissueqqiineq kisimi pineqarunnaarluni kisiannili maanna Naalakkersuisut piumaffigineqarput 2026-ip naannginnerani aaqqiissutissanik tigussaasunik minnerpaamik pingasunik saqqummiussaqaarnissaat.

Naleraq isumaqarpoq tamanna pitsaasumik alloriarnerusoq periarfissarlu taanna tigulluarneqartariaqartoq.

Naleqqamiit aamma erseqqissaatigissavarput siunnersuutip aallaaviatigut siunertaa allanngunngimmat. Meeqqat assigiinngitsumik pineqassanngillat angajoqqaavisa aningaasarsiaat tunngavigalugit. Meeqqat tamarmik assigiimmik naleqarput, taanna pingaarnepaavoq, tamannalu aaqqiivigineqarnissaa siunertaavoq.

Taamaattumik Naleqqap ataatsimiititaliap isumaqatigiittup allannguutissatut siunnersuutaa taperserpaa, aammalu Naalakkersuisut kaammattorlugit suliaq aqqutit eqqortut atorlugit sukkanerpaamik naammasseqqullugu, taamaalilluni ilaqutariit meeqqaminnik perorsaasut ukiuni aggersuni pitsaanerusunik atugassaqartinneqalissammata.

Meeqqanut aningaasaliineq aningaasartuutaannaanngilaq. Siunissamut aningaasaliineruvoq.

Qujanaq.